



CENTRALE BANK VAN ARUBA

BCA ta mantene e reserva obligatorio na 25,5 por ciento entrante 1 di maart 2023.

Relato di prensa

Conforme e tarea di e Comite di Maneho Monetario (CMM) pa evalua, determina y duna transparencia riba e accionnan di maneho monetario di Banco Central di Aruba (BCA), BCA ta comunica lo siguiente. Durante e reunion di 16 di februari 2023, CMM a dicidi pa mantene e tasa di e reserva obligatorio na 25,5 por ciento entrante 1 di maart 2023. Di e manera aki, e banconan comercial mester tene un balansa minimo na BCA cu ta igual na 25,5 por ciento di e depositonan riba termino cortico di nan clientenan. E decision pa mantene e reserva obligatorio na 25,5 por ciento ta basa riba estimacion di un caida significante den likides excesivo na januari 2023 compara cu december 2022. BCA lo sigui monitoreo e desaroyo den likides excesivo den e siguiente lunanan y lo por dicidi di cambia e tasa di reserva obligatorio atrobe, si ta considera esaki necesario.


E CMM a considera e siguiente informacion y analisis den su deliberacion:

Reservanan internacional y oficial

E reservanan internacional, cu ta consisti di reservanan oficial di BCA y reservanan di divisa na e banconan comercial, a baha cu Afl. 117,3 miyon te cu 3 di februari 2023, compara cu fin di december 2022 (Grafico 1). E reservanan oficial a mengua cu Afl. 97,6 miyon, mientras cu e reservanan na banconan comercial a disminui cu Afl. 19,7 miyon. Consecuentemente, te cu 3 februari 2023, e reservanan oficial y internacional a suma Afl. 2.693,3 miyon y Afl. 3.123,9 miyon, respectivamente.

Pa sostene un nivel adecua di reservanan ta esencial pa mantene e tasa di cambio fiho entre e florin Arubano y e dollar Mericano. Teniendo cuenta cu esaki, reservanan internacional a keda ampliamente riba e rekisito di tres luna di pago riba e cuenta corriente di e balansa di pago den e prome luna di 2023. E pagonan riba e cuenta corriente di e balansa di pago ta consisti, entre otro, di pagonan pa importacion, pagonan di interes na inversionistanan stranhero y transferencianan pa exterior manera placa manda afo door di trahadonan stranhero. Reservanan oficial tambe a keda dentro di e margen aceptabel basa riba e metrico 'Assesing Reserve Adequacy' (ARA) di e Fondo Monetario Internacional (FMI) (Tabel 1).

Grafico 1. Reserwanan oficial y internacional (incluyendo revaluacion)
(Fuente: CBA)



Tabel 1: Metriconan relata na reserwanan observa den 2022

	jan
Cobertura di pagonan riba cuenta coriente ¹	7,3
Metrico di FMI ARA ²	103,9

¹ E cantidad di luna di pagonan riba cuenta coriente cu e reserwanan internacional ta cubri.

² E proporcion entre e nivel di reserwanan oficial y e nivel minimo adecua (conforme FMI), den porcentonan.

Inflacion


Inflacion, midi na final di luna contra e luna di e aña anterior, a resulta na 5,7 por ciento den december 2022 (november 2022: 6,6) (Grafico 2). E aumento den e Indice di Prijs di Consumo (IPC) na december 2022 compara cu december 2021 tabata causa door di e crecimiento den prijs di utilidad, cu a afecta e componente di ‘vivienda’ (contribuyendo cu 3,0 punto di porcentahe). Tambe e prijs di gasoline a subi, cu na su turno ta influencia e componente di ‘transporte’ (contribuyendo cu 1,5 punto di porcentahe), mientras cu prijsnan den e componente ‘cuminda y bebida no alcoholico’ tambe a aumenta (contribuyendo cu 1,5 punto di porcentahe).

E inflacion midi riba promedio di 12 luna a subi te na 5,5 por ciento, compara cu 5,3 por ciento na november 2022. E presion inflacionario tawata debi na e nivel eleva di prijs di petroleo riba mercadonan internacional y e aumento den prijs di awa y coriente desde augustus 2022. Ademá, Aruba a importa un gran parti di e aumentonan den prijs for di su partnernan comercial, particularmente Estados Unidos y Europa.

Mientrastanto, na december 2022, inflacion basico (excluyendo cuminda y energia) a alcanza 1,6 por ciento si midi e final di respectivo luna contra e mes un luna di e año anterior. Basa riba un promedio di e ultimo 12 lunanan, inflacion basico a yega na 2,2 por ciento.

Grafico 2. Inflacion basa riba e indice di prijs di consumo
(Fuente: CBS, december 2022)

Por ciento




Likides excesivo na banconan comercial

E total di likides excesivo na e banconan comercial a baha di Afl. 1.320,5 miyon na december 2021 te na Afl. 819,7 miyon na december 2022 (Grafico 3). E caida den likides excesivo ta debi principalmente na e subidanan consecutivo den e tasa di reserva obligatorio durante e periodo di januari 2022 te cu juli 2022. Ademá, estimacion preliminar di e likides excesivo na januari 2023 a indica un caida adicional di Afl. 187,1 miyon compara cu december 2022. Sinembargo, likides excesivo a permanece riba e nivel estima (+Afl. 350,0 miyon) cu e banconan comercial posibelmente ta desea di tene pa motibonan di cautela.

Grafico 3: Likides excesivo di banconan comercial
 (Fuente: CBA)

Afl. milyon



Banco Central di Aruba
 27 di maart 2023